

Baldi, Niccal e Jaquan da retuorn


Reediziun d'una collecziun dals comics da Paulin Nuotclà

DA REST GIACUN DERMONT / ANR

■ Da l'on 1976 fin 1989 ha disegnat Paulin Nuotclà mincha mais ün comic rumantsch. Baldi e consorts tuornan uossa darcheu grazcha a la reediziun cumünaiuola da la CER e l'UdG. Las baschattas da Baldi, Niccal e Jaquan han fascinà 15 ons a l'inlunga a scolaras e scolaras da l'Engiadina e la Val Müstair. Mincha mais cumpariva ün nouv comic rumantsch disegnat da Paulin Nuotclà. Ils quaderns culs comics ed eir ingiavineras gnivan scumpartits gratuitamaing illas scoulas ladinhas. La Chasa Editura Rumantscha (CER) e l'Uniuin dals Grischs (UdG) han reedi üna collecziun dals comics da l'artist oriund a Ftan. Quista reediziun vain preschantada in sonda i'l Chesin Manella a Schlarigna. Nuotclà as regorda da la naschentscha dals prüms Comics rumantschs.

Alch chi nu daiva amo in rumantsch

«Eu d'eira da l'idea cha quist medium ans mancaiva in lingua rumantscha. Aint pella mità dals ons 70 vai'eu cumanzà perquai a disegnar comics. L'unica pussibilità da tils publicar füss statta illa revista satirica 'Chardun', as regorda Nuotclà chi ha frequentà la Scoula d'art a Basilea, «precis cur ch'eu n'ha dumandà al 'Chardun', es gnüda la nouva cha Bernina von Guaita haja l'intenziun d'edir comics rumantschs.» El s'ha miss in contact culla fautura chi s'ingaschaiva fermaing pel mantegnimaing da la lingua e la cultura rumantscha. L'intent da Bernina von Guaita (1903–1995), oriunda da la Germania, d'eira da promover culs



Il frontispizi da la collecziun da Comics rumantschs chi cumpara prosmamaing.

Comics rumantschs la lectüra in rumantsch fingià pro'ls uffants.

Bernina von Guaita e Paulin Nuotclà in coproducziun

Bernina von Guaita ha frequentà la scoula a l'Institut Otalpin a Ftan. Da quel temp gniva quella nomnada «Höheres Töchterinstitut». «Davo gniva giunfra Bernina adüna cun seis genituors in vacanzas in Engiadina, plü tard eir suletta», disch l'artist Paulin Nuotclà. Davo sia pensiun abitaiv'la a Zuoz ed a Puntraschigna. «La redacziun dals Comics rumantschs faiva ella. Eu vaiva da furnir las istorgias e per part gös ed ingiavineras ch'ella nu faiva svesa.» Ils scolaras implivan oura las ingiavineras e tramettaivan las soluziuns a Bernina von Guaita. Ils noms dals victuors gnivan adüna indichats i'l prossem numer. Da guadagnar daiva cudeschs rumantschs. Ils Comics rumantschs gnivan stampats illa Stamparia Engiadinaisa a Samedan.

Sco imprendere ad ir culs skis

«Meis prüms comics d'iran graficaing ün pa malsvouts», disch Nuotclà, «ma i'l cuors dals ons esa gnü adüna meglder – ün pa sco inchün ch'imprenda ad ir culs skis.» Las ideas pellas prümas istorgias vaiva gnü Nuotclà svesa, magari baschattas ch'el vaiva fat d'uffant o da quellhas ch'oters til vaivan quintà o eir da si'aigna fantasia. Plü tard ha'el eir cumanzà a tour elemaints da tarablas da l'Engiadina o da las Dolomitas e tillas transpuoner. «Our da l'istorgia da Clà Biert «Il gial da San Chaprizi' n'haja fat üna deschina da comics.» Las figüras comicas ha inven-

tà l'artist svesa. «Eu n'ha gust cha'ls comics vegnan darcheu reedit», s'allegra l'artist. In tuot ha'el disegnat i'ls ons 1976 fin 1989 passa 1200 paginas pels Comics rumantschs. La prüma collecziun da quists comics chi cumpara prosmamaing cuntegna 48 paginas. L'idea da l'UdG es da publicar i'ls prossem ons ulteriuras collecziuns dals comics da Paulin Nuotclà.

La preschantaziun dals «Comics rumantschs» da Paulin Nuotclà reedit cumainza in sonda, ils 28 marz a las 15.00 i'l Chesin Manella a Schlarigna.

Festa da commemoraziun

In sonda, ils 28 marz invida il team dal Chesin Manella a Schlarigna ad üna festa da commemoraziun per Franca Bernina von Guaita. A quella chaschun preschaintan Aita Dermont da l'UdG, Anita Capaul da la CER e Paulin Nuotclà la reediziun dals Comics rumantschs. La festa cumainza a las trais la davomezdi cun ün'exposiziun da gös e publicaziuns da Bernina von Guaita, inromada da musica da Paulin Nuotclà e Curdin Nicolay. Il pled da bainvgnü tegna Jacques Guidon. Davo las quatter sta sül program üna maisa raduonda cun Gion Gaudenz, Paulin Nuotclà e Gion Tschanner. A las tschinch haja nom «gös cul public» cun Göri Klainguti sco mainagös. Per finir daja üna marendra accumpagnada da musica.

Il capo da Scuol in visita a Guarda

Orientaziun e discussiun dals da Guarda cun lur nouv capo

DA BENEDICT STECHER / ANR

■ Il capo da Scuol, Christian Fanzun, ha visità las fracziuns dal cumün grond cul böt d'infuormar e discutir cun la populaziun. A Guarda d'iran preschaints eir Roger Vulpi, il represchantant da Guarda, e Jon Carl Stecher, il manader da fabrica da Scuol. Davo la fusiun dals cumüns da Guarda, Ardez, Ftan, Tarasp, Scuol e Sent ch'è in vigur daspö il principi dal 2015 ha il capo dal cumün fusiun Scuol visità las fracziuns. «Il böt es da gnir a cugnuescher ils abitants da las singulas fracziuns ed impustüt eir dad udir ils pissers e giavüschs invers il cumün grond. Mincha fracziun ha sias particularitats e differents sistems cun temas individuals. Nos intent es da respunder dumondas al lö e da notar temas actuals per chattar üna soluziun perdüraivla», ha orientà Fanzun. In lüdeschdi ha el visità insemel cun Roger Vulpi, il represchantant da Guarda e commember da la suprastanza da Scuol, e cul manader da fabrica e d'infrastructura Jon Carl Stecher la fracziun da Guarda. «Eu sun stut cha tants han chattà la via per gnir a nosa sairada d'infuormaziun e discussiun, insemel laina provar da chattar soluziuns per voss problems.»

L'organisaziun dal nouv cumün

Il prüm ha el orientà davart l'organisaziun dal nouv cumün e nomnà quai chi s'ha fingià raggiunt e quai chi sto amo gnir fat. «La suprastanza cul capo e seis rapreschantants dals singuls cumüns e cun set dicasteris fuorman la part strategica dal nouv cumün. Mincha suprastant es respunsabel per ün dicasteri e vain sustgnü da diversas cumischiuns. L'organ a la testa da l'organigram sun la radunanza e la comunità d'urna.» I'ls prüms trais mais


sun fingià gnüdas approvadas las ledschas d'aua, l'aua persa e da las immundizchas. Sco prossem stan avant la ledscha da pulizia e pumpiers chi vegnan preschaintadas a la radunanza cumünala dals 20 avrigl. La decisiun vain tratta a l'urna als 14 da giün. «No vain da schoglier amo divers problems, quai sun per nomnar be ün pèr il Bogn Engiadina, la halla da glatsch, l'implant da Trü ed il bogn cuernà da Quadras.» Per realisar la Biosfera Val Müstair faja dabsögn d'üna zona circundanta chi sto gnir sancziunada dal chantun e da la confederaziun. Eir quai

vain trattà a la radunanza manzunada e decis a l'urna als 14 da giün.

Discussiun früttaivla

Aint illa discussiun es gnüda manzunada tanter oter eir la problematica da las taxas da cura. Ün dals preschaints as dumonda co chi's pudess chattar üna soluziun. «No savain chi va a perder blera munaida causa cha las taxas vegnan pajadas be per part. Perquai esa previs d'infuormar il fittaders d'abitaziuns ed hoteliers e da chattar ün'otra soluziun per gnir als raps cha no dovrain», ha dit il ca-

po Fanzun. Il runal da skis e la piazza da glatsch a Guarda gnivan procurats in prüma lingia da persunas privatas. «Quel problem vain no eir in otras fracziuns e qua staina chattar üna soluziun per cha diversas da quellhas lavurs possan gnir fattas in futur eir dals lavurants da cumün», ha dit Stecher. Otras dumondas sun gnüdas notadas e gnaran trattadas in suprastanza. Dal rest han ils preschaints lodà la buna lavur dals respunsabels dal nouv cumün e tuot quai chi s'haja raggiunt fingià i'ls prüms trais mais buns resultats.



Christian Fanzun, Roger Vulpi e Jon Carl Stecher han orientà ils abitants da Guarda.

SCHLARIGNA

Sustegn pel Champiunadi da skis mundial 2017

(anr/fa) Ils cumüns d'Engiadin'Ota as partecipeschan cun trais milliuns francs als cuosts pel CM 2017 a San Murezzan. La radunanza cumünala da Schlarigna ha approvà unanimamaing da pajar 349 200 francs per quel adöver.

Sainza cuntravusch ha concess in lüdeschdi saira la radunanza cumünala da Schlarigna plüs credits. I'l territori Suot Mulin esa dvantà necessari da sanar üna lingia da chanalisaziun e d'aua persa. Ils preschaints han fat bun il credit correspudent da 500 000 francs. La gruppa forestala da Schlarigna dovress duos veiculs novs e la gruppa da lavurants cumünals eir ün. La radunanza cumünala ha acceptà il credit da 190 000 francs per cumparar quists veiculs. Dals 6 als 19 favrer 2017 ha lö a San Murezzan il Champiunadi da skis mundial (CM). Sco fingià pro'l CM 2013 esa previs cha'ls cumüns dal circül d'Engiadin'Ota as partecipeschan finanziaing a la realisaziun dal champiunadi in duos ons. Per Schlarigna significha quai üna contribuziun da 349 200 francs. Unanimamaing ha acceptà la radunanza cumünala quist credit.

Ulteriur record per Freddy Nock

■ (cp) Freddy Nock ha realisà ses proxim record mundial da Guinness. Sin 3500 meters sur mar è el chaminà da la Crasta Bella (Biancograt) fin tar il Piz Prielvus. Quai è ina distanza da 347 meters. Oriundamain aveva l'artist Freddy Nock dentant vuli realisar in record dubel e ballantschar senza segirada e senza vesair tranter las duas muntognas da passa 3500 meters. El è dentant ballantschà cun vesida. La chappelina, ch'avev cuvert ils eglis, ha el laschè davent. Sia «intuziun» haja ditg ad el ch'il ristg saja memia grond, ha ditg Nock.

FOTO B. STECHER